

四庫全書薈要

• 乾隆御覽本

經部

漢上易傳

〔宋〕朱震撰

欽定四庫全書薈要

經部

漢上易傳卷一



詳校官祭酒臣韋謙恒

漢上易傳

提要



臣等謹案漢上易傳卦圖叢說總一十五卷
宋朱震撰震字子發荊門軍人宋史有傳自
王弼之說行而漢易遂亡震學以象數為宗
推本源流上溯周漢包括異同以救晉代清
言之失其功頗鉅至于論圖書授受謂陳搏

以先天圖傳种放更三傳而至邵雍种放又
以河圖洛書傳李溉更三傳而至劉牧穆修
以太極圖傳周敦頤再傳至程顥程頤厥後
雍得之以著皇極經世牧得之以著象數鉤
隱圖敦頤得之以著太極圖說通書頤得之
以述易傳其說頗為後儒所傳述實自震發
之然宋志謂其論圖書原委莫知所自則亦
未嘗不疑之矣又宋世皆以易九數為洛書

十數為河圖獨劉牧以十數為洛書九數為
河圖震此書亦用其說是均不免于好異分
別觀之可也震于高宗時為趙鼎所薦召問
易春秋之旨以所學對後歷官至翰林學士
實由此受知其題曰漢上易傳則因其所居
而名之也乾隆四十二年二月恭校上

總纂官

臣紀昀

陸錫熊

臣孫士毅

總校官

臣

陸費

墀

漢上易傳原序

聖人觀陰陽之變而立卦效天下之動而生爻變動之
別其傳有五曰動爻曰卦變曰互體曰五行曰納甲而
卦變之中又有變焉一三五陽也二四六陰也天地相
函坎離相交謂之位七八者陰陽之雜六九者陰陽之
究雜不變也究則變焉謂之策七八九六或得或失雜
而成文謂之爻昔周人掌三易之法一曰連山二曰歸
藏三曰周易七八者連山歸藏也六九者周易也經實

備之策三變而成爻爻六變而成位變者以不變為體
不變者以變者為用四象並行八卦交錯而天地萬物
之情可見矣其在繫辭曰爻象動乎內吉凶見乎外又
曰道有變動故曰爻此見於動爻者也乾生三男坤生
三女乾交乎坤自姤至剝坤交乎乾自復至夬十有二
卦謂之辟卦坎離震兌謂之四正四正之卦分主四時
十有二卦各主其月乾貞於子而左行坤貞於未而右
行左右交錯六十卦周天而復陰陽之升降四時之消

息天地之盈虛萬物之盛衰咸繫焉其在易之復曰七
日來復象曰至日在革曰先王以治歷明時在說卦曰
震東方也巽東南也離南方之卦也兌正秋也乾西北
之卦也坎正北方之卦也艮東北之卦也此見於卦變
者也乾生者四卦坤生者四卦八卦變復生六十二坎
離肖乾坤者也大過小過頤中孚肖坎離者也故乾坤
不動而坎離四卦亦莫之動其畧陳於雜卦其詳具於
六十四卦之彖所謂辨是與非者也此卦變之中又有

變焉者也一卦含四卦四卦之中復有變動上下相揉
百物成象其在易則離震合而有頤坤離具而生坎在
繫辭則罔罟取離耒耨取益為市取噬嗑舟楫取渙服
乘取隨門柝取豫杵臼取小過弧矢取睽棟宇取大壯
棺槨取大過書契取夬又曰八卦相盪又曰六爻相雜
唯其時物也又曰雜物撰德此見於互體者也一生水
而成六二生火而成七三生木而成八四生金而成九
五生土而成十生於陽者成於陰三天兩地也生於陰

者成於陽兩地而三天也天以三兼二地以二兼三五
位相得合而為五十其在繫辭曰天一地二天三地四
天五地六天七地八天九地十在說卦曰巽為木坎為
水離為火此見於五行者也乾納甲壬坤納乙癸震納
庚巽納辛坎納戊離納己艮納丙兌納丁庚戌丙三者
得於乾者也辛巳丁三者得於坤者也始於甲乙終於
壬癸而天地五十五數具焉其在易之蠱曰先甲三日
後甲三日在巽曰先庚三日後庚三日在離曰已日乃

乎在繫辭曰懸象著明莫大乎日月此見於納甲者也
凡此五者之變自一二三四言之謂之數自有形無形
言之謂之象自推考象數言之謂之占聖人無不該也
無不徧也隨其變而言之謂之辭辭也者所以明道也
故辭之所指變也象數也占也無不具焉是故可以動
可以言可以制器可以卜筮蓋不如是不足以明道之
變動而盡夫時中也故曰繫辭焉而命之動在其中矣
夫易廣矣大矣其遠不可禦矣然不越乎陰陽二端其

究則一而已矣一者天地之根本也萬物之權輿也陰陽動靜之源也故謂之太極學至於此止矣卦可遺也爻可忘也五者之變反於一也是故聖人之辭因是而止矣

漢上易傳卷一

宋 朱震 撰

上經



乾下
乾上

乾元亨利貞

乾健也元始也亨通也升降往來周流六虛而不窮者也利者得其宜也貞者正也初九九三九五正也九二九四上九變動亦正也故九二曰龍德而正中者也乾具此四德故為諸卦之祖程顥曰一德不具

不足謂之乾伏羲初畫八卦乾坤坎離震巽兌艮因而重之歸藏之初經是也商人作歸藏首坤次乾夏后氏作連山首艮而乾在七其經卦皆六十有四至于文王首乾次坤以乾坤坎離為上篇震巽艮兌為下篇繫以卦下之辭周公繼之乃有爻辭

初九潛龍勿用九二見龍在田利見大人九三君子終日乾乾夕惕若厲无咎九四或躍在淵无咎九五飛龍在天利見大人上九亢龍有悔用九見羣龍无首吉

易有四象六七八九七八不變者也六九變者也歸
藏連山用七八易用六九而七八在其中變者以不
變者為基不變者以變者為用陸績曰陽在初稱初
九去初之二稱九二則初復七陰在初稱初六去初
之二稱六二則初復八矣卦畫七八經書九六七八
為彖九六為爻四者互明聖人之妙意也乾為馬六
爻皆以龍言之何也乾體本坤陽以陰為基也自震
變而為乾震變乾則乾為龍乾變震則震為馬故震

其究為健

彖曰大哉乾元萬物資始乃統天雲行雨施品物流形
大明終始六位時成時乘六龍以御天乾道變化各正
性命保合大和乃利貞首出庶物萬國咸寧

夫子作上彖下彖上象下象文言上繫下繫說卦序
卦雜卦十篇以贊易道其篇不相附近不居聖也至
陳元鄭衆傳費氏易馬融作傳鄭康成傳之康成之
後注連經文王輔嗣始分象辭附於爻下乾存古文

也一者數之始乾之元也陽生於子萬物資之而有
氣一變而七七變而九四之為三十六六之為二百
一十有六而乾之策備矣乾天也萬物資始於天天
之道始於一故曰乃統天此贊元也六爻天地相函
坎離錯居坎離者天地之用也雲行雨施坎之升降
也大明終始離之往來也所謂亨也萬物殊品流動
分形陰陽異位以時而成乾自子至戌坤自未至酉
男卦從乾而順女卦從坤而逆所謂時也六位循環

萬物生生而不窮者乎此贊亨也聖人時乘六龍潛見躍飛御天而行體元亨也乾坤相交是生變化萬物散殊各正性命性源同而分異命稟異而歸同太和者相感絪縕之氣天地之所以亨也各正性命保之而存合之而聚不貞則不利故曰乃利貞不曰乾坤而曰乾道者乾行坤從天之道也此贊利貞也乾為首震生萬物坤為衆變震為蕃庶積震成乾首出乎庶物之上五辟四諸侯三公二大夫初元士各正

其位萬國咸寧體利貞也乾君道體元亨利貞而後
盡大君之道

象曰天行健君子以自彊不息

易者象也有卦象有爻象彖也者言乎象者也言卦
象也爻象動乎內言爻象也夫子之大象別以八卦
取義錯綜而成之有取兩體者有取互體者有取卦
變者大槩彖有未盡者於大象申之天所以為天者
健也萬里一息其行不已君子以是自彊不息不敢

橫私其身也夫不息則久久則徵徵則悠遠悠遠則博厚博厚則高明博厚配地高明配天乾言不息配天也坤言厚德配地也兩者誠而已矣獨於乾言誠者誠天之道也

潛龍勿用陽在下也見龍在田德施普也終日乾乾反復道也或躍在淵進无咎也飛龍在天大人造也亢龍有悔盈不可久也用九天德不可為首也

夫子小象辭也晉太史蔡墨曰在乾之姤曰潛龍勿

用在乾之同人曰見龍在田此繫辭所謂乾一索再索三索陸續所謂初九九二也初九變坤下有伏震潛龍也陽氣潛藏在下之時玄曰昆侖旁薄幽也二居地表田也坤變為離離為文文章炳明見龍也龍德而見如日下照施及於物者普矣玄曰龍出乎中龍德始著也三變離兌日在下終日也初九九二乾乾也初九始正也九三終正也終則有始反復乾乾動息不離于道者也三則極極則反反則復非終日

乾乾能之乎玄曰首尾可以為庸程顥曰終日乾乾對越在天蓋上天之載无聲臭也初二三有伏震震為龍為足五為坎九四變離兌兌為澤澤淵也足進乎五或躍也伏震為龍退而在淵也九居四履非其位宜有咎進則无咎堯老而舜攝舜老而禹徂征之時乎玄曰東動青龍光離于淵程頤易傳曰量可而進其適時则无咎九五坎變離離為飛乾為天離淵而飛飛龍在天也離為目見也九五動九二大人應

而往造之利見大人也玄曰龍幹于天長類無疆上
九變兌兌為毀折亢滿之累也盈極則虛不可久也
玄曰南征不利九陽剛之極乾天德在萬物之先復
用陽剛之極則剛過矣人所不能堪也九六陰陽之
變也九變則六六變則九九六相用剛柔相濟然後
適乎中關子明曰以六用九易傳曰以剛為天下先
凶之道也伏爻何也曰京房所傳飛伏也乾坤坎離
震巽艮兌互相伏者也見者為飛不見者為伏飛方

來也伏既往也說卦巽其究為躁卦例飛伏也太史公律書曰冬至一陰下藏一陽上舒此論復卦初爻之伏巽也

文言曰元者善之長也亨者嘉之會也利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞

文言者錯雜四德六爻反復成文設為問答往來相

錯亦文也故太玄準之以玄文天地之大德曰生元者生物之始善之長也其在人則仁也亨者天地之極通衆美之期會也利由屈信相感而生或屈或信各得其宜義者宜也語義則利在其中矣貞正也在物則成也玄所謂水包貞也有德乃有事德不正則事不立立事之謂幹唯仁者宜在高位故君子體仁足以長人凡長於人皆長也物不可以苟合必致飾焉故嘉會足以合禮嘉會如嘉魂魄是也利順物理

而行之各得其所欲者也故利物足以和義守正堅固不為萬物之所撓奪乃能建立庶事故貞固足以幹事君子剛健不息行此四德故曰乾元亨利貞張載曰天下之理得元也亨會而通也說諸心利也一天下之動貞也

初九曰潛龍勿用何謂也子曰龍德而隱者也不易乎世不成乎名遯世无悶不見是而无悶樂則行之憂則違之確乎其不可拔潛龍也九二曰見龍在田利見大

人何謂也子曰龍德而正中者也庸言之信庸行之謹
閑邪存其誠善世而不伐德博而化易曰見龍在田利
見大人君德也九三曰君子終日乾乾夕惕若厲无咎
何謂也子曰君子進德修業忠信所以進德也修辭立
其誠所以居業也知至至之可與幾也知終終之可與
存義也是故居上位而不驕在下位而不憂故乾乾因
其時而惕雖危无咎矣九四曰或躍在淵无咎何謂也
子曰上下无常非為邪也進退无恒非離羣也君子進

德修業欲及時也故无咎九五曰飛龍在天利見大人
何謂也子曰同聲相應同氣相求水流濕火就燥雲從
龍風從虎聖人作而萬物覩本乎天者親上本乎地者
親下則各從其類也上九曰亢龍有悔何謂也子曰貴
而无位高而无民賢人在下位而无輔是以動而有悔
也

乾之變化龍德也初九變坤謂之潛龍龍德而隱者
也初之四變九為六易世也初九隱伏不易乎世也

易如天下有道吾不與易也之易歷有元會運世世者辰也初九子之四易午故曰易世震為聲巽見震伏不成乎名也二為中二動為庸初九依乎中庸初之四成兌說遯世而无悶也初九變不正不見是而无悶也不見是而无悶者舉世非之而不加損也之四行也兌說樂也樂則行之也退而失位為憂憂則退違之也巽為木在下確乎其不可拔潛龍也初九一爻之四或曰遯或曰行何也曰自依乎中庸言之

二陰遯也自初九之四言之行也此所謂曲而中也
九二之動龍德而正中者也庸者中之用也二之五
兌為口為言上行為行言行也言中庸而應庸言之
信也行中庸而正庸行之謹也言行變化不失其中
故謂之庸初九九三上下正閑邪也九二動正中存
誠也誠自成也非外鑠也閑邪則誠自存猶之烟盡
火明波澄水靜閑之者誰歟莫非誠也言信行謹閑
邪存誠其德正中自二之五善涉乎世矣然且不自

伐以正中而遊人間者也允隱矣二不行矣不聞其
言不見其行不伐也德施而光普博也文明而巽化
也唯至誠為能化其德如是宜之五為君也是以利
見九五之大人故曰君德五君位也顏子擇乎中庸
而弗失之夫子告之以為邦九二君德故也乾剛之
德自初至三進德也九二動成巽巽為事業者事之
成動而巽修業也兌為口正以動忠信也忠信所以
進德也巽言不離於忠信修辭也二正誠也巽為股

立也修辭以立誠誠立而其業定修辭所以居業也
初九知中之可至則行而至之初可與乎幾也九三
知中之不可過則動而終之三可與存乎義也義者
時措之宜也玄曰諸一則始諸三則終二者其得中
乎是故九三動而弗處居上位而不驕也初九遯而
无悶在下位而不憂也是則乾乾者進德修業立誠
以居之而已非安夫上位而不去也故乾乾因其時
而惕雖危无咎巽為多白眼惕也九三之動危厲也

離日在上為朝在五為晝在三四為日昃為夕為終
日在二為暮夜為明入地中日在三故曰夕惕九四
動之五進而上也復之四退而下也故曰或躍或疑
辭也謂非必也九四動正也之五不正疑為邪四臣
位五君位出乎臣之類離羣也三陽為羣然上下進
退无常者乃九三進德修業至是欲及時爾故進則
无咎不然四近君多懼安得无咎易傳曰聖人之動
无不時也五變之二成巽下有伏震巽風震雷同聲

相應也二動之五成兌下有伏坎兌澤坎水同氣相求也五之二兌澤流坎水流濕也二之五離火見離燥卦火就燥也五變來之二二有伏震雲從龍也二巽往之五五兌成虎風從虎也九五中正而居天位聖人作也二震為萬物離目為覩萬物覩也九五變六六本乎地故親下而見二九二應五九本乎天故親上而見五易傳曰乾之二五則聖人既出上下相見共成其事所利者見大人也九居上處極貴而失

尊位无位也王弼謂初上无位誤也三變成坤坤為
衆民也三不變高而无民也賢人九三剛正也不變
以應之賢人在下位而上无輔也故動則有悔貴高
而盈亢則窮也爻辭曰大人文言曰聖人聖人有大
之極而不為其大大而化也

潛龍勿用下也見龍在田時舍也終日乾乾行事也或
躍在淵自試也飛龍在天上治也亢龍有悔窮之災也
乾元用九天下治也

易傳曰言乾之時也潛龍勿用時在下也見龍在田
時可止也舍止也井初六為九五捨之與此象異二
陽方進而未泰故可舍止音爰舍之舍九二變遯艮
有止意終日乾乾進而行事之時非乾乾不能堪其
事巽行事也或躍在淵上下進退无常自試時也飛
龍在天在上而致治時也亢龍有悔陽窮於九陰窮
於六位窮於上窮則變變則通通則久上九窮不知
變窮之災也天災曰災數極時也玄有三統九會陽

以九終以極數也然天人有交勝之理故有悔天德不可為首用九不見其首則不過不過中也六位得中天下治也

潛龍勿用陽氣潛藏見龍在田天下文明終日乾乾與時偕行或躍在淵乾道乃革飛龍在天乃位乎天德亢龍有悔與時偕極乾元用九乃見天則

易傳曰言乾之義也乾伏坤見陽氣潛藏故曰潛龍勿用坤文離明德施之普光于天下人文明也故曰

見龍在田三陽方行亦與之行故終日乾乾行不息也周公繼曰待旦之時乎四人位五天位離人之天水火相息乾道革矣故曰或躍在淵天不可階而升也不曰位乎君位而曰位乎天德者成性躋聖也張載曰受命首出則所性不存焉故曰飛龍在天亢龍有悔上極也消息盈虛與時偕行則无悔偕極則窮故有悔也六九相變天地之道不可違之則也乾元始也於其始也用九其終不過矣以其不可過也故

曰天則見天則則知中道乃固然之理非人能為之也

乾元者始而亨者也利貞者性情也乾始能以美利利天下不言所利大矣哉大哉乾乎剛健中正純粹精也六爻發揮旁通情也時乘六龍以御天也雲行雨施天下平也

元者乾之始剛反而動亨在其中矣利貞者乾之性情也性情猶言資質也動而生物利也不有其功常

久而不已貞也貞正也始則亨亨則利利則貞在其
中諸卦言利者指事而言之利於此或不利於彼乾
始萬物資之天下至大无不蒙其利者不言所利則
其利大矣故謂之元元又訓大故也夫子欲言乾道
之大其辭有不能盡者故曰大哉乾乎乾總言之則
剛不撓也健不息也健者積剛而成也悉數之則中
正而不倚也純全而粹美也一三五正也二五中也
中而正者其九五乎八卦皆純也純而粹者其重乾

乎故玄準之以晬其首辭曰陽氣杓晬清明道至於純粹无以復加矣而六者皆原於一一者何乾始也天地之本萬物之一源精之又精剛健中正純粹自此而出故曰剛健中正純粹精也易傳曰精謂六者之精極也以一言該之曰正正者乾之性也六爻發越揮散旁通於諸卦被於三百八十四爻无往而不利者乾之情也情變動也性不變者也時乘六龍者以御天而行也雲行雨施者天下平均也二者體元

亨也元亨則利貞在其中矣蓋雲行雨施品物流形則萬物各正其性命矣鄭康成本作情性

君子以成德為行日可見之行也潛之為言也隱而未見行而未成是以君子弗用也君子學以聚之問以辯之寬以居之仁以行之易曰見龍在田利見大人君德也九三重剛而不中上不在天下不在田故乾乾因其時而惕雖危无咎矣九四重剛而不中上不在天下不在田中不在人故或之或之者疑之也故无咎夫大人

者與天地合其德與日月合其明與四時合其序與鬼神合其吉凶先天而天弗違後天而奉天時天且弗違而況於人乎況於鬼神乎亢之為言也知進而不知退知存而不知亡知得而不知喪其唯聖人乎知進退存亡而不失其正者其唯聖人乎

君子積善成德以其成德行之為行日可見於外而不可掩者行也九二是也隱之為言隱伏而未見於世行而其德未成是以弗用張載曰未至於聖皆行

而未成之地初九正其始二益之而說學以聚之也
聚者升而上也兌為口問以辯之也二動中虛虛則
有容寬以居之也動而以巽行仁以行之也學聚問
辯寬居仁行二與五應有君德也是以言行如上云
九三九四以剛乘剛而不中過乎剛也二為田九三
居下位之上雖上不在天而下已離田動則危且有
咎故乾乾不息因其可危之時而惕則雖危无咎矣
中二爻人也四上不在天下不在田或進而之五則

中不在人可懼之地也故疑而未決上下進退不必
於處是以无咎九三之惕九四之疑可謂能用九矣
雖重剛不中何患於過乎道者循萬物之理而行其
所无事者也天地之覆載日月之照臨四時之消長
鬼神之吉凶豈有意為之哉大人其道與天地日月
四時鬼神合故順至理而推行之先後天而不違天
且不違而況於人乎況於鬼神乎鬼神者流行於天
地之間者也是以九五利見大人也亢者處極而不

知反者也萬物之理進必有退存必有亡得必有喪
亢知一而不知二故道窮而致災人固有知進退存
亡者矣其道詭於聖人則未必得其正不得其正則
與天地不相似知進退存亡而不失其正者其唯聖
人乎故兩言之前曰大人此曰聖人知進退存亡不
失其正則德合陰陽與天地同流而无不通矣此大
而化之者也



坤下
坤上

坤元亨利牝馬之貞君子有攸往先迷後得

主利西南得朋東北喪朋安貞吉彖曰至哉坤元萬物
資生乃順承天坤厚載物德合无疆含弘光大品物咸
亨牝馬地類行地无疆柔順利貞君子攸行先迷失道
後順得常西南得朋乃與類行東北喪朋乃終有慶安
貞之吉應地無疆

萬物資乾以始而有氣資坤以生而有形乾始而亨
无所待也是以能大坤待乾而行乃能至於大有氣
而後有形也故乾元曰大哉坤元曰至哉天健也坤

順而承之故曰坤天先地後而生萬物坤為大輿自
下載之積厚也天无疆者也坤所以配之者載物之
德合乎无疆故地配天坤合乾乾坤之始皆謂之元
光者坎離也大者乾陽也靜翕含之也以育其根動
闢弘之也以成其形一靜一動品物咸亨故曰亨品
物咸亨者離之時也乾為馬坤變之為牝馬牝馬地
類也无疆者乾之行也坤依乾而行以柔承剛以順
承健乃能行地无疆故曰利牝馬之貞利牝馬之貞

則非不言所利此坤之利所以異於乾之利歟君子
乾之象柔順坤之德一三五天也二四六地也陽以
奇為正陰以偶為正陽先陰後柔順承乾乃得坤正
則柔順者利於承乾以為正也是以君子體坤而行
行者攸往也故曰君子攸行猶乾言時乘六龍首出
庶物也一三五不得其正先迷也失坤道也牝雞无
晨西雲不雨故曰先迷二順一四順三六順五順乾
得主坤道有常有常者坤之利也臣待君唱女須男

行故曰後得主利子夏傳曰先迷後得主也二進至三坤體成西南坤也止而不進成艮東北艮也坤陰生於午至申三陰成矣自申抵戌羣陰得朋宜若有得也而至亥成坤萬物皆虛故曰西南得朋乃與類行乾陽生於子至寅三陽成矣自寅抵辰陰類浸亡宜若有喪也而至巳成乾萬物皆盈故曰東北喪朋乃終有慶是以得君者臣之慶得親者子之慶得夫者婦之慶三者未有不離其朋類而得者也故曰東

北喪朋乃終有慶坤以順為正而地之順天而无疆者順夫正也臣有獻替婦有警戒子有幾諫各安其正乃能悠久而无窮安貞之吉應乎地之所以无疆也故曰安貞吉張載曰東北喪朋雖得主有慶而不可懷也虞翻以月之生死論之曰從震至乾與時偕行消乙入坤滅藏於癸坤終復生陰陽之義配日月其大致則同

象曰地勢坤君子以厚德載物

天高西北地傾東南以順之故水潦有所歸而萬物
各得其所君子積順德而至博厚故能容載萬物
初六履霜堅冰至象曰履霜堅冰陰始凝也馴致其道
至堅冰也

陰者小人之道也一陰生於午剥乾之初也五陰而
霜降六陰而堅冰初六之動柔成剛陰始凝也莫之
禦焉駸駸然馴致乎盛陰而小人之道極矣故觀其
所踐履則一陰始凝知其必至於履霜堅冰也震為

足自下而進履也或曰坤之初六五月也何以有履
霜堅冰之象曰所謂見微者也寒露者剥之初六也
霜降者剥之六五也剥之初六即坤之初六也剥之
六五即坤之六五也剥窮成坤上六也露者坤之氣
寒氣入之故露為霜立冬水始冰亦坤之初六也於
斗建為亥乾金之氣為冰故坤之初六一爻自始卦
言之為五月自剥卦言之為九月至五陰而霜降自
坤卦言之為十月為亥至六陰而成冬亥所謂水凝

地坼非見不見之形者其能知小人之禍於甚微之時乎

六二直方大不習无不利象曰六二之動直以方也不習无不利地道光也

六二中正而動中故直正故方直者遂也方者不易其宜也易曰乾其靜也專其動也直是以大生焉又曰坤至柔而動也剛至靜而德方而說卦乾為直坤為方方亦剛也故曰六二之動直以方也重坎為習

二動成坎不習也動而之五得正不習无不利也坎
為光光大也易傳曰二為坤之主中正在下盡地之
道故以直方大三者形容其德由直方大故不習而
无不利不習謂自然也在坤道則莫之為而為也在
聖人則從容中道

六三含章可貞或從王事無成有終象曰含章可貞以
時發也或從王事知光大也

坤離為文明三爻之成為章坤見離伏含章也人臣

當含章不耀以其美歸之君六三不止非容悅者也
可正也六三動則正惟含章也故當可動而動以時
發也坤德含弘光大含章者坤之靜也以時發者坤
之動也靜而含動而弘坤之所以承天歟乾為王伏
巽為事三內卦之上為成上為外卦之終或從王事
者三之上也坤作成物无以成功自居有終其事而
已為臣而終其事職當然也六三以是從王事得恭
順之道知光大矣坎離合為知知如日月之明光大

也邵雍曰陽知其始而享其成陰效其法而終其勞
六四括囊无咎无譽象曰括囊无咎慎不害也

坤為囊六四動成艮艮為手括囊也六四正動則不
正四有伏兌兌為口不正无譽可也无咎何邪六四
當天地否塞賢人遯藏之時不利君子正故止其口
而不出者慎也慎以全身故於義不害若立人之本
朝道不行矣而括囊緘默罪也安得无咎故此爻不
以位言之

六五黃裳元吉象曰黃裳元吉文在中也

五尊位六居之人臣當此唯守中居下乃得元吉否則必凶黃地之中色文者地道之美見於山川動植者也裳下體之飾曰黃則守中有地道之美而不過故曰文在中也曰裳則居下雖處尊位而不失坤之常唯守中不過斯能居下矣以是而動動則得二元吉也元吉者言其始本自吉非變而吉也故元吉在吉為至善

上六龍戰于野其血玄黃象曰龍戰于野其道窮也

上六坤之窮十月也其位在亥乾之位十一月復震
震變乾為龍上六變乾乾為天卦外天際也野之象
野莫知所適之地坤道已窮動而不已臣疑於君乾
坤交戰君臣相傷不知變通故也

用六利永貞象曰用六永貞以大終也

六陰柔之極不濟之以陽剛則邪佞之道故以九用
六乃能永久不失其正杜欽曰地道貴斂陽始之陰

終之未始離陽故曰以大終也

文言曰坤至柔而動也剛至靜而德方後得主而有常
含萬物而化光坤道其順乎承天而時行積善之家必
有餘慶積不善之家必有余殃臣弑其君子弑其父非
一朝一夕之故其所由來者漸矣由辯之不早辯也易
曰履霜堅冰至蓋言順也直其正也方其義也君子敬
以直內義以方外敬義立而德不孤直方大不習无
利則不疑其所行也陰雖有美含之以從王事弗敢成

也地道也妻道也臣道也地道无成而代有終也天地變化草木蕃天地閉賢人隱易曰括囊无咎无譽蓋言謹也君子黃中通理正位居體美在其中而暢於四支發於事業美之至也陰疑於陽必戰為其嫌於无陽也故稱龍焉猶未離其類也故稱血焉夫玄黃者天地之雜也天玄而地黃

至柔至靜者坤之體也動而剛方者坤之用也方亦剛也以其不可易言之謂之方其體則坤用則隨乾

觀其所動而坤之順德見矣含萬物而生之者陰含陽也玄曰天鬱化精地隱魄榮隱所謂含萬物也及其化生品物咸章保厥昭陽坤道乃光坤之光即乾之光大也玄曰天炫炫出於无畛熒熒出於无垠炫炫熒熒所謂化光也坤道至矣一言可盡其順矣乎天動地隨其行有時故承天而時行善不善之報必有餘者馴而不已積之既久則末流必多乾坤是也家言臣子也坤積至五子弑父臣弑君離日坎月自

下而進非一朝一夕之故其所由來者漸矣辯之不
早其禍至此矧不辯乎先儒嘗以乾坤論之謂君子
之道有時而消於是有坤化陽滅者矣然而復出為
震者餘慶之不亡也小人之道有時而消於是有陽
息陰盡者矣然而極姤生巽者餘殃猶在也觀諸天
道月之生死晦盡而生明既滿而成虧先儒餘慶餘
殃之論為不誣矣是故有虞之子不肖而陳齊永祚
商辛之後有國而祿父再亡敬者操持其誠心而弗

敢失也二動以直敬以直內也直內言內省不疚其
理直也方者義之不可易也有所不為有所不行也
二往之五義以方外也誠者合內外之道內直外方
敬義立矣敬義立則相應相與其德不孤放諸四海
而準以直方大也又動為行巽為不果二動震見巽
伏不習无不利則不疑其所行也上曰中則直此言
直其正何也曰正而不中者有矣中則正矣天地之
間萬物粲然而陳者皆陽麗於陰託之以為美者也

陽盡則陰之惡畢見不能自美矣然陰雖有陽之美
當含蓄之以從王事待時而發不有已也豈敢當其
成功哉乾巽從王事也地道无成順天而行乾知大
始坤代有終自然之道也故臣終君之事妻終夫之
事不言子者臣子一也泰之時天地變化草木亦蕃
而況人乎否之時天地閉塞賢人亦隱而況草木乎
三才一理也是故併言之括囊无咎非閉其言而不
出蓋言謹也謹者莊子所謂慎為善也陰進至三成

否否泰反其類故其言如此坤五黃中動而成坎傳所謂坤之比也坎為通有美在中而通於理理者中正也天地萬物之所共由者也通於理則大美具矣美在其中矣五君位六變九正位也正位而居坤體不失為臣之道黃裳也九五艮艮為手二五相易成震震為足暢於四支也巽為事業者事之成發於事業也誠則形形則不可掩故美在其中暢於四支發於事業通於理者无往而不通其伊尹周公共伯和

之事乎月盛則掩日臣彊則疑君陰疑於陽必戰十月純坤用事而稱龍者天地未嘗一日而無陽亦未嘗一日而无君子為其純陰嫵於无陽也故稱龍焉乾在故也上六之動坤成乾其體剝剝者復之反震變也十一月復復初九庚子子坎之位坎為血震為玄黃血幽陰也上六疑陽未離陰類故稱血焉震者天地之一交天玄而地黃玄者坎中之陽黃者離中之陰天地之雜也其血玄黃者君臣相傷也雖欲力

勝莫之助也故聖人於初六戒之上六則无及已鄭
本作爲其無於陽也故稱龍焉或問初之四二之五
三之上六爻反復相應何也曰京房所傳世應也三
畫之卦一二三重爲六爻四即初五即二上即三各
以其類相應邵雍曰有變必有應也變乎內者應乎
外變乎外者應乎內變乎下者應乎上變乎上者應
乎下本乎天者親上本乎地者親下變之與應常反
對也故卦一世者四應二世者五應三世者上應四

世者初應五世者二應六世者三應在易言應者一
十有九卦昔之言應如子太叔論迷復凶是也至虞
翻始傳其秘然未盡善繫辭曰變動不居周流六虛
上下无常剛柔相易世應者相易之一也故曰兩則
化一則神



震下
坎上

屯元亨利貞勿用有攸往利建侯彖曰屯剛

柔始交而難生動乎險中大亨貞雷雨之動滿盈天造
草昧宜建侯而不寧

自屯豕而下乃以卦變為象屯臨之變自震來四之
五震者乾交於坤一索得之剛柔始交也四之五成
坎坎險難剛柔始交而難生也易傳曰始交而未暢
為屯在時則天下未亨之時此以震坎釋屯之義也
安乎險而不動與動乎險中不以正皆非濟屯之道
初九正也四之五得位大者亨以正而利也以天地
觀之剛柔始交鬱而未暢雷升雨降其動以正則萬
物滿盈乎天地之間有不大亨乎此以初九九五釋

元亨利貞也震雷也坎雨也兌澤上而成坎故為雨
初九屯之主也初往之五行必犯難益屯而不能亨
矣君子宜守正待時故勿用有攸往此言初九也天
造之始草創冥昧人思其主能乘時衆建諸侯使人
人各歸以事主雖有强暴誰與為亂哉四為諸侯九
五在上六四正位分民而治建侯也雖則建侯而未
始忘乎險難震為草乾之始也坤為冥昧坎為勞卦
故曰天造草昧宜建侯而不寧此再言初九九五也

以卦氣言之十月卦也太玄準之以礮或曰聖人既重卦矣又有卦變何也曰因體以明用也易无非用用无非變以乾坤為體則以八卦為用以八卦為體則以六十四卦為用以六十四卦為體則以卦變為用以卦變為體則以六爻相變為用體用相資其變无窮而乾坤不變變者易也不變者易之祖也所謂天下之動貞夫一也故曰剛柔相推變在其中矣繫辭焉而命之動在其中矣又曰辭也者各指其所之

考其所命之辭尋其辭之所指則於變也若辨白黑
矣夫易之屢遷將以明道而卦之所變舉一隅也推
而行之觸類而長之存乎卜筮之所尚者豈有既哉
故在春秋傳曰某卦之某卦者言其變也若伯廖舉
豐之上六曰在豐之離知莊子舉師之初六曰在師
之臨其見於卜筮者若崔子遇困之大過者六三變
也莊叔遇明夷之謙者初九變也孔成子遇屯之比
者初九變也南蒯遇坤之比者六五變也陽虎遇泰

之需者六五變也陳仲遇觀之否者六四變也周官
太卜掌三易之法其經卦皆八其別皆六十有四八
卦謂之經則六十四卦為卦變可知故曰卦之所變
舉一隅也王弼盡斥卦變以救易學之失救之是也
盡斥之非也

象曰雲雷屯君子以經綸

坎在上為雲雷動於下雲蓄雨而未降屯也屯者結
而未解之時雨則屯解矣彖言雷雨之動滿盈者要

終而言也解絲焚者綸之經之經綸者經而又綸終則有始屯自臨變離為絲坎為輪綸也離南坎北南北為經經綸也君子經綸以解屯難凡事有未決反復思念亦此象也

初九盤桓利居貞利建侯象曰雖盤桓志行正也以貴下賤大得民也

初九剛正屯難之始上有正應震動體進則犯難成巽為進退九居曰不安故盤桓子夏傳曰盤桓猶桓

旋也盤桓不進利於守正不進非必於退也志在行其正也初九不忘上行之謂志志剛中也志行正也可不盤桓以待時乎初動濟屯四諸侯位建國命侯資以輔五屯難未解衆陰不能自存有剛正之才使之有國則衆從之陽貴陰賤坤衆爲民九退復初以貴下賤大得民也故曰利建侯夫子時楚有四縣趙簡子命下大夫受郡必言利建侯者建侯萬世之利也或問震又成巽何也曰所謂雜物撰德也撰數也

且以屯論之坎陽物也震動也四比於九五自三柔
爻數之至於九五巽也震陽物也巽陰物也剛者陽
之德柔者陰之德剛柔雜揉不相踰越故曰雜而不
越先儒傳此謂之互體在易噬嗑彖曰頤中有物曰
噬嗑離震相合中復有艮明夷彖曰內文明而外柔
順以蒙大難又曰內難而能正其志坎難也離坤相
合中復有坎在繫辭曰八卦相盪先儒謂坎離卦中
互有震艮巽兌在春秋傳見於卜筮如周太史說觀

之否曰坤土也巽風也乾天也風為天於土上山也
有山之材而照之以天光於是乎居土上自三至四
有艮互體也王弼謂互體不足遂及卦變鍾會著論
力排互體蓋未詳所謂易道甚大矣

六二屯如遭如乘馬班如匪寇婚媾女子貞不字十年
乃字象曰六二之難乘剛也十年乃字反常也

九五屯之主六二中正而應共濟乎屯者也故曰屯
如二乘初九欲往應五迫於剛強遭回而不能去故

連如乾變震為作足之馬震為足乘馬也初不應五
二欲應之與馬別矣故乘馬班如春秋傳曰有班馬
之聲杜氏曰班別也五坎為盜盜據山險寇也男曰
婚女曰姻媾男女合也九五應六二婚媾也五自初
九視之有險難之象寇也自六二視之匪寇也婚媾
也特以乘剛故耳初九六二正也而致六二之難者
剛乘柔則順柔乘剛則逆妻不亢夫臣不敵君天地
之道故曰六二之難乘剛也二五相易五之二成兌

兌女子也二之五成坤坤為母女子而為母字育也坤
見坎毀剛柔以中正相濟屯解之象坤為年其數十六
二守正不苟合於初而貞於五是以不字屯難之極至
於十年二五合剛柔濟兌女乃字屯本臨二之五合則
九反二六反五坤為常故曰反常也王弼曰屯難之世
其勢不過十年孰謂弼不知天乎坤為年何也曰歲陽
也陽生子為復息為臨為泰乾之三爻也夏后氏建寅
商人建丑周人建子无非乾也古之候歲者必謹候歲

始冬至日臘明日正月旦日立春日謂之四始四始亦乾之三爻也坤十月陰也禾熟時也故詩十月納禾稼春秋書有年大有年喪禮三年者二十七月也六三即鹿无虞惟入于林中君子幾不如舍往吝象曰即鹿无虞以從禽也君子舍之往吝窮也

六三柔不當位不安於屯妄動以求五五君位艮為黔喙震為決躁鹿也言有求於君也若上六變而應三艮變巽離有結繩為罔罟之象艮為手虞人指蹤

而設網罟者也上六在君之側而不應譬之即鹿无
虞人以導其前豈惟不得鹿乎往而徒反退之三陷
于林莽中美艮為山震為木林也三四為中林中也
六三有從禽之欲不知事有不可貪求妄動是以陷
于林中而不恤故曰即鹿无虞以從禽也君子初九
也知不可往往无所獲且有後患故見幾而舍之舍
止也艮也君子安於屯不若六三徒往而窮自取疵
吝

六四乘馬班如求婚媾往吉无不利象曰求而往明也
六四柔而正上承九五坎為美脊之馬艮為手乘馬
也四自應初五自應二其情異乘馬而班別者也故
曰乘馬班如六四雖正有濟屯之志五不求而往豈
能行其志哉五求四男下女陰陽相合斯可往矣往
之上得位故吉无不利艮為手求也坎為月震東
方明之時也九五有明德故求而往吉无不利否
則志不應有凶易言出入往來何也曰出入以度內

外也卦有内外自内之外曰出自外之内曰入出者
往也入者來也往者屈也來者伸也出入往來屈伸
相感而无窮天道東面望之來也西面望之往也故
晉之出為明夷之入蹇之往為解之來

九五屯其膏小貞吉大貞凶象曰屯其膏施未光也

坤為民兌為澤五之二成兌有膏澤下於民之象膏
澤下則五之所施光矣坎為月有光之象故也屯之
時九五得尊位六三不正處內卦之極震體而有坤

權臣挾震主之威有其民者也六三墜之九五之膏澤不下故曰屯其膏言人君之屯也九五中正守位六二六四上六自正陰為小故小吉五動而正三以君討臣則三復乘五蓋膏澤不下五之施未光民不知主禍將不測矣故大貞凶易傳曰膏澤不下威權已去而欲驟正之求凶之道也魯昭公高貴鄉公之事是也若盤庚周宣修德用賢復先王之政諸侯復朝以道馴致為之不暴又非恬然不為若唐之僖

昭也不為則常屯以至於亡矣

上六乘馬班如泣血漣如象曰泣血漣如何可長也

上六屯之極也五坎為美脊之馬動而乘之上應三五自應二雖欲用五濟屯其情異矣乘馬而班別也上動成巽巽為號上反三成離為目坎為血泣血也上不得乎君以濟屯難極矣无如之何是以泣盡繼之以血漣而不已上之三連兩離爻故曰漣如然屯極矣極則必變何可長也巽為長



坎下
艮上

蒙亨匪我求童蒙童蒙求我初筮告再三瀆
瀆則不告利貞彖曰蒙山下有險險而止蒙蒙亨以亨
行時中也匪我求童蒙童蒙求我志應也初筮告以剛
中也再三瀆瀆則不告瀆蒙也蒙以養正聖功也

止於外不可進也險在內不可止也險而止莫知所
適蒙也此以艮坎二體言蒙也蒙者屯之反屯者物
之穉故蒙而未亨有屯塞之義九二引而達之屯塞
者亨矣屯九五大者亨五反為二以亨道行也蒙有

可亨之理當其可亨之時而亨之使不失其中者時中也學者禁於未發發而後禁則過時而弗勝故曰蒙亨以亨行時中也此以九二言亨也艮為少男童蒙也我者二自謂也二在下不動有剛中之德以自守匪我求童蒙也二柔順與五相應艮為手求之象童蒙求我也童蒙求我然後二以志應五志謂剛中也二為衆陰之主四陰皆求於二而志應者應五也震為草以手持草筮也筮占決也五動二應初筮告

也初筮告者以剛中也。不問而告與問一而告二皆非剛中。夫不憤不啓，不悱不發，蒙塞極矣。於是求達焉，則一發而通通，則不復塞矣。此初筮所以告也。六三六四不與二相應，再三瀆瀆，則不告也不待其欲達，隨其屢問而告之，決之不一，不知所從，則必燕辟廢學，棄其師訓，瀆與黷同。此以二三四爻言亨蒙之道也。蒙自二至上，體頤頤養也。九二一爻自發蒙者言之，剛中也。然而未正，故戒之以利貞。自蒙者言之，

純一之德未發童蒙養之至于成德躋位乎中正則
聖功成矣蓋學未至於聖未足謂之成德故夫子十
五志于學至于七十而從心所欲不踰矩則蒙以養
正作聖之功也虞翻曰二志應五變得正而蒙亡此
以二五言利貞也在卦氣為正月故太玄準之以童
象曰山下出泉蒙君子以果行育德

坎水在山下有源之水泉也山下出泉未有所之蒙
也泉積盈科其進莫之能禦故君子果其行必育其

德德者行之源有德者養源也果行則發而必至震
為行乾剛為德坎水上為雲下為雨在山下為泉象
其物宜也

初六發蒙利用刑人用說桎梏以往吝象曰利用刑人
以正法也

初六之動發蒙也蒙蔽之民不善其始至死於桎梏
而不悔初六發蒙利用此刑人刑人非惡之也以正
法也於其始也正法以示之蒙蔽者知戒終不陷於

刑辟用說桎梏之道也艮手震足交於坎木桎梏之象坎為律法也初六動而正正法也允為刑殺允見坎毀說桎梏也治蒙之初威之以刑然後漸知善道過此以往則吝矣卦言童蒙爻言刑人刑所以輔教也易傳曰立法制刑乃所以教也後之論刑者不復知教化在其中矣

九二包蒙吉納婦吉子克家象曰子克家剛柔接也六五柔也九二剛也五以柔接剛為二所包含章有

美而效之君臣道之正也二之吉也故曰包蒙吉二以剛接柔為五所納艮男為夫巽女為婦婦有相成之道虛其中以納之君道之正五之吉也故曰納婦吉二在內為家坎為乾之子父有子而至於納婦子克荷其家者也九二而致其君虛中納之非其道廣其施博積誠以包蒙能若是乎譬之子克家者也二不能包則五不肯納上柔不接家道廢矣故曰子克家剛柔接也二為家何也曰二內也大夫之位大夫

有家雜卦曰家人內也

六三勿用取女見金夫不有躬无攸利象曰勿用取女行不順也

六三蒙而不正之陰坎有伏離離目為見上九不正下接六三成兌兌為少女取女也艮少男夫也乾變為金見金夫也坤為身兌折之為躬三之上不有躬坤為順三不正行不順无攸利故戒以勿用取女取女貴正女正則家人吉六三見利而悅不能自有其

躬上九說之以利於德為不正於理為不順取是女而欲正家是亦蒙矣

六四困蒙吝象曰困蒙之吝獨遠實也

陽為實九二剛實發蒙之主二與五應三動而近二四獨遠之若動而應初則與二相近四懷居不動獨遠於二介於不正无以發其蒙困而不學吝自取也二坎三動成兌澤無水困也故曰困蒙之吝獨遠實也陽為實何也曰陰消為虛陽息為實消息盈虛相

為去來消則降息則升實則滿虛則耗升者貴也降者賤也滿者富也耗者貧也陰陽相循禍福更繼故又為貴賤貧富禍福之象太玄曰盛則入衰窮則更生有實有虛流止无常又曰消與息紕貴與賤交禍至而福逃

六五童蒙吉象曰童蒙之吉順以巽也

艮少男童也五求於二成坤坤順也二往資五成巽巽巽也順則易從巽則易入順則樂告之以善道巽

則優柔以開導之以此治蒙優於天下矣童蒙之吉也五君位成王求助之爻乎

上九擊蒙不利為寇利禦寇象曰利用禦寇上下順也為寇者九二也擊蒙禦寇者上九也坎為盜體師盜用師寇也艮為手擊也為寇者利於蒙闇昏亂之時蒙極而解則是非定蒙暗明故曰不利為寇上九乘其蒙解之時自上之三擊之坎毀成兌民悅而從之上下之情順也孟子謂取之而燕民悅也坤為順故

曰利用禦寇上下順也易傳曰若舜征三苗周公誅
三監禦寇也蒙屯之反何也曰姤變者六復變者六
遯變者十有二臨變者十有二否變者十有二泰變
者十有二反復相變聖人所以酬酢也陸震亦曰卦
有反合爻有升降所以明天人之際見盛衰之理焉



乾下
坎上

需有孚光亨貞吉利涉大川彖曰需須也險

在前也剛健而不陷其義不困窮矣需有孚光亨貞吉
位乎天位以正中也利涉大川往有功也

需須也須待也剛健上行遇險未動待時者也故曰
需須也險在前也坎險也陽陷於陰中陷也困者水
在澤下也需自二而上有困反之象三陽剛而健能
須以進動而不屈不陷於險善用剛健者也故曰剛
健而不陷其義不困窮矣此以兩體言乎需也須以
進者需有孚而後進也孚者已也孚之者人也豈能
遽孚之哉需自大壯變大壯四陽同德四與五孚未
進之時雖未得天位其德固已剛健有孚特道未彰

爾及其自四而進則位乎天位乃光亨也光坎離之
象光亨者以貞吉也九五正中待物之須而不匱者
唯正中乎故曰貞吉需道至於光亨位乎天位為須
之主萬物需之貞吉也二者夫子之待價也五者天
下之望成湯也此以二五言需之才也坎為大川自
四之五往也乾剛須時而往何難不濟故曰利涉大
川往有功也於卦氣為二月故太玄準之以夷僊
象曰雲上於天需君子以飲食燕樂

雲上於天蓄膏澤而未降須也君子蓄其才德未施於用亦須也飲食以養其氣體燕樂以養其心志居易俟命待時而動蓋需有飲食之道膏澤所以養萬物也坎為水兌為口為和說

初九需于郊利用恒无咎象曰需于郊不犯難行也利用恒无咎未失常也

三乾天際也四在內外之交曰郊五坎為險難初九正應六四而險難在前當守正不動以需其應不先

時而動不犯難而上行故曰需于郊不犯難行也風雷相與不失其正天地可久之道曰恒謂五變四動而交乎下也九五虛中以需六四屈已以下之如是應時之需則上下相與可久而无咎陰之從陽地道之常也初九陽在下需六四之應而以巽行以上下言之未失常也九五剛健中正而曰犯難者非其應而往無因而至前志未通也或問利用恒也順以巽也乾道乃革也何取於卦也曰卦變也所謂之某卦

也需利用恒者需之恒也蒙六五順以巽者蒙之觀也乾九四乾道乃革者乾之小畜也小畜之中又有離兌故曰革是謂天下之至變

九二需于沙小有言終吉象曰需于沙衍在中也雖小有言以吉終也

五坎為水二三兌為澤水往矣而其剛留於澤者剛鹵也二在澤中剛而柔沙之象沙近於險者也五不應二故二需之九二得中剛而能柔待時而動其動

必以正積誠既久二五相合坎化為坤險難易而為
平行矣需于沙而不妄動則平行固在其中矣故曰
需于沙行在中也六四與五近而相得四見二不應
而需之與已異趨小有言宜矣兌口為言也君子自
守亦何傷哉夫子不進猶不免於有言矧餘人乎二
非終不進也動則正正則吉而兌毀雖小有言終无
凶也故終吉象言以吉終者二之五以吉行故有終
勉之也

九三需于泥致寇至象曰需于泥災在外也自我致寇敬慎不敗也

坎水坤土水澤之際為泥九三剛健之極進逼於險已將陷矣需于泥也上六坎在外為災故曰需于泥災在外也九三守正可也動則上六乘之坎為盜盜有戎兵寇也寇雖險我動不正而迫之已甚則至故曰致寇至上乘三成坤為輿坎為車多眚則敗也九三正而明能抑其剛健持之以敬慎而不動誰能敗

哉敬者持其正也三四下有伏艮艮止也慎之象故
曰自我致寇敬慎不敗也

六四需于血出自穴象曰需于血順以聽也

乾變坎為血九五大壯乾變故曰血坎為隱伏兌為
口穴也六四處險者也據坎兌之際三陽自下而進
故曰出自穴六四安其位以一陰礙之有險在前進
退不可則陰陽必至於相傷小人安險不傷不已故
曰需于血為六四者不競而順以聽之則善故曰需

于血順以聽也惟順以聽是以三陽出自穴而无違焉六四坤順也坎耳聽也

九五需于酒食貞吉象曰酒食貞吉以中正也

需至于五陰已退聽難已獲濟位乎天位應天下之須坎震為酒兌口在下酒食之象酒食所以養人者也故曰需于酒食九五為需之主應之以中正而已天下之需於五者无須不獲各足其量而止如飲酒者止於醉食者止於飽需者无窮應者不動故貞吉

貞吉者以中而正也中則養之者不過過則應之有
時而窮故曰酒食貞吉以中正也坎震為酒何也曰
震為禾稼麥為麴蘖東方穀也故東風至而酒湧
上六入于穴有不速之客三人來敬之終吉象曰不速
之客來敬之終吉雖不當位未大失也

需者訟之反三陽自外而入坎兌為穴故曰入于穴
客在外主人以辭速之曰吾子入矣主人須矣九五
需之主也三陽乾兌居西北之位客也自外而入主

人未應不速之客也三人者三爻也故曰不速之客
三人來敬者持其正也上六九三當位而應九二初
九不當位而不應君子固有至於是邦无上下之交
者豈可以不速之客而不敬乎三陽同類也敬其一
不敬其二則需之者所失大矣爻辭言不速之客三
人來敬之終吉而象辭去其三人止曰不速之客來
者為上六也上六於二於初為不當位也當位而應
則得一人不當位而兼應之則得三人自不當位言

之則失也自得三人言之則雖不當位未大失也終吉者不失其正故吉卦體需也有所失人則失需之義矣卦四陽君子二陰小人於六四戒之以順聽於上六戒之以敬客君子得位則小人得其所故為小人謀者如此



坎下
乾上

訟有孚窒惕中吉終凶利見大人不利涉大川彖曰訟上剛下險險而健訟訟有孚窒惕中吉剛來而得中也終凶訟不可成也利見大人尚中正也不利

涉大川入于淵也

乾健也坎險也兩者相敵所以訟也无險则无訟无健则不能訟險而健故訟此以兩體言訟也訟自遯來九三之二二有孚于五剛來撝於二陰之中剛實有孚信而見窒於人不窒则无所事於訟矣雖有孚也然剛失位見窒於二陰邪正是非上未辯也能惕懼處柔訟而不過乎中則免矣離為目巽為多白眼惕之象故曰有孚窒惕中吉剛來而得中也此以訟

三之二言九二之才也訟剛過而不反終成其訟必凶故曰終凶訟不可成也此以成卦上九言訟之終也九五大人聽訟者也中正在上无所偏係君子小人各得其平故九二利見之以中正為尚也離為目見也有善聽者然後孚信懼而得中吉故曰利見大人尚中正也此以九五言訟之主也訟一變巽二變鼎三變大過坎水變兌川壅為澤乾首沒于澤中入于淵也天下之難未有不起於爭剛險不相下君子

小人不容難始作矣聖人見其訟也戒之中正戒之不可成若濟之以爭是以亂益亂相激而為深矣漢唐之亂始於小人為險君子疾之已甚其弊至於君子小人淪胥以敗而國從亡故曰不利涉大川入于淵也此以卦變終言一卦之義也在卦氣為清明三月節故太玄準之以爭卦一變二變何說也曰在賁之彖曰柔來而文剛分剛上而文柔在無妄之彖曰剛自外來而為主於內此舉一隅也剛柔相變上

下往來明利害吉凶之无常也是故一卦變六十有三此焦延壽易林之說也

象曰天與水違行訟君子以作事謀始

天西行水東行違行也行相違乃有訟巽為事乾陽始於坎作事而謀始則訟不作窒訟之源也

初六不永所事小有言終吉象曰不永所事訟不可長也雖小有言其辯明也

初與四應九二間之此初六所以訟也初往訟二四

來應初坎毀巽降兌見坎險也兌說也巽為事坎又
為可不永所訟之事也訟事之險者不永所事以訟
不可長也永其訟者未有不及禍者也兌為言陰為
小小言也初六往而直已九四體離而明四剛初
柔各得其正故雖小有言而其辯易明明故終吉初
以四為終也易傳曰在訟之義同位而相應相與者
也故初與四為獲其辯明同位而不相得相訟者也
故二與五為對敵也

九二不克訟歸而逋其邑人三百戶无眚象曰不克訟歸逋竄也自下訟上患至掇也

二五本相應以兩剛不相下此二所以訟五也然五君也其德中正以不正而訟中正不可也況以臣訟君乎不克訟者義不克也故退歸而逋則其邑人三百戶得以无眚不然五來討二禍及邑人矣歸者二自五而反逋者失位而竄坎為隱伏坤為衆坎動入於衆中竄也故曰不克訟歸逋竄也自下訟上於勢

為逆於義為非禍患至於逋竄自取之猶掇拾也二
去成艮手掇拾之象乾策三十有六坤策二十有四
九二變則二三坤策四五乾策合而言之三百也坤
為戶二在大夫位為邑自三至五歷三爻坎在內為
眚二動去位則无眚故曰其邑人三百户无眚太玄
曰兩虎相牙掣者全也歸而逋之謂乎古者諸侯建
國大夫受邑諸侯之下士視上農夫食九人中士倍
下士上士倍中士大夫倍上士卿四大夫君十卿祿

天子之大夫視子男大國之卿當小國之君然則諸侯之卿當天子之大夫也食二百八十有八人三百戶舉全數也

六三食舊德貞厲終吉或從王事无成象曰食舊德從上吉也

乾為剛德上九陽極而老舊也三之上成兌為口食舊德也食舊者食其素分猶言不失舊物也古者分田制祿公卿以下必有圭田以德而食其來舊矣公

卿以下所食如周官家邑小都大都之田是也三公
位乾上九郊之象六三當爭勝之時不喪其舊以不
訟四而從上也三從上而四間之宜有訟然三柔而
明柔則不能訟明則知不可訟而止是以從上而食
舊德六三介九二九四兩剛之間而失位厲也往從
上九則上屈其剛就之无所事訟得位而食終吉也
三之從上非苟從也或從王事以成功歸之已終其
事不以无事而食是以食舊德也非從上之吉乎乾

五為王巽為事三內卦之成上外卦之終故曰或從
王事无成有終寶嬰訟田蚡上下相激至亡其身不
知六三之吉也易傳曰訟者剛健之事故初則不永
三則從上二爻皆以處柔不終而得吉四亦不克而
渝得吉訟以能止為善也

九四不克訟復即命渝安貞吉象曰復即命渝安貞不
失也

訟生於仇敵故有忿爭不安其命者焉九四上承五

下乘三而初為應五君也不可訟也三從上初從四
无與為敵者故不克訟乃克其剛強欲訟之心而與
初相應相應則情義相得各復其所何訟之有各復
其所者復即命也命者正理也復即命則變前之失
安於正理矣訟者始於剛強而不明九四處柔體離
巽柔巽故无狠怒明則知可否斯九四所以能復者
歟巽為命何也曰巽為風風者天之號令在人則命
也受之於天也故先儒以巽為命為號令為事巽象

曰申命行事正與否則繫乎爻位之得失陸績曰訟之復乾變而巽

九五訟元吉象曰訟元吉以中正也

九五聽訟之主未能使人无訟何謂元吉大人得尊位以中正在上无所偏係邪枉之道不行故吉元吉者其始本吉吉之至善者也此臯陶淑問召伯聽訟之爻

上九或錫之鞶帶終朝三褫之象曰以訟受服亦不足

敬也

三限乎上下之際腰之象也上九之三或錫之乾變
為金腰以金飾鞶帶也三離日之上為終朝允為毀
折伏艮為手為受服三復位鞶帶毀有褫之象也故
曰或錫之鞶帶終朝三褫之自五之三歷三爻三褫
也敬者人以其正足憚故敬之上九成訟而居上位
受服不以正知其雖有是物亦不足取敬於人內自
愧恥不安其服是以終朝三褫之爭訟逆德非人之

本心故不克訟則歸而逋竄以訟受服則愧而三禡
䷆ 坎下 師貞丈人吉无咎彖曰師衆也貞正也能以
衆正可以王矣剛中而應行險而順以此毒天下而民
從之吉又何咎矣

坤衆也五陰而一陽為主利於用衆二有震體震
動也聚衆而動之亦用衆也周官自五人為伍積之
至於二千五百人為師亦衆也故曰師衆也用師之
道以正為本九二動之五正也苟動不以正出於忿

驚驕矜雖迫之以威非得其心也惟一本於正使衆人皆得其正天下之民將歸往之王者之道也師自復來初之二者也一變師二變謙三變豫四變比至比而得尊位可以王矣要終而言也故曰貞正也能以衆正可以王矣丈人者尊嚴可信長者之稱身在險中服其勤勞則衆應之能以衆正者也震為長之象言九二也武王之於尚父宣王之於方叔是已子夏傳本作大人將帥之道不剛則慢而不肅剛而不

中則暴而无親剛中矣而上无柔中之主以應之則睽孤内顧動輒見疑已且不暇恤其能成功乎古者人君之用將既得其人矣跪而推轂付之斧鉞進止賞罰皆決於外不從中制是以出則有功語天下之至險者无若師也師動以義而民從之雖至險而行之以順也坎自初之二進而上行行險而順也凡藥石攻疾謂之毒師之所興傷財害物施之天下至慘也聖人不得已而用之以去民之害猶用毒藥以攻

疾雖曰毒之其實生之以此毒天下而民安有不從者哉兼是五者唯九二乎是以吉而无喪敗合於義而无咎也坎為險又為毒者險難之所伏也醫師聚毒藥以攻疾所以濟險難也故又為藥故曰剛中而應行險而順以此毒天下而民從之吉又何咎矣在卦氣為立夏四月故太玄準之以衆

象曰地中有水師君子以容民畜衆

物之在天地間至多者无若水也地中能有之師之

象也故土雖緻密而含通流泉河海之大不能出其
涯涘君子寬以容民又有度量上下維持以畜衆繫
辭曰陽一君而二民陰二君而一民民謂陰爻也有
陽爻則陰爻為民所謂容民者言內卦也坤為衆所
謂畜衆者言外卦也或曰隱至險於大順伏師旅於
民衆井田之法也

初六師出以律否臧凶象曰師出以律失律凶也

坎坤為律律謂之法者度量衡之法起於黃鍾之九

寸黃鍾坎位也爾雅曰坎律銓也兵法地生度度生
量量生數數生稱稱生勝師出以律則教道素明兵
卒有制勝敵之道也初六不正動則坤坎毀師失律
之象也否臧失律也否讀為可否之否劉遵曰否字
古之不字也失律者為不善否臧則不善杜預亦曰
否不也故辭曰否臧象曰失律失律則凶矣或曰師
出无名而以律可謂臧乎曰司馬掌九伐之灋不正
而動是亦失律安得不凶春秋傳晉荀首曰在師之

臨曰師出以律否臧凶執事順成為臧逆為否衆散
為弱川壅為澤有律以如已也故曰否臧其律竭也
盈而以竭大且不整所以凶也曰師之臨者初六動
而成兌也坤為衆坎為律為川坤毀則衆散坎毀則
川壅而律竭

九二在師中吉无咎王三錫命象曰在師中吉承天寵
也王三錫命懷萬邦也

卦五陰聽于一陽在下而專制其事者也有人臣惟在

師可以專制然專制疑於擅權不專制无成功之理
得中道乃吉而於義无咎九二剛居柔威和並用得
中者也故能承天寵天寵者龍光也乾在上為天五
坎為光二震為龍二之專制以五寵之譬之地道含
萬物而化光非天地之施乎惟在師得中乃能承天
寵不然怙寵而驕必有凶咎莫教自用得臣剛而無
禮安能承天寵哉坤在上為邦四諸侯三公五乾為
王九自四歷三爻二有伏巽為命王三錫命懷萬邦

也古者諸侯入為天子之卿天子之卿為六軍之將
王錫命之至于三極數也然亦不過乎中萬邦所以
懷歟過則濫賞有功者不悅非所以懷來之九自五
之二懷來也

六三師或輿尸凶象曰師或輿尸大无功也

九二以剛中之才行師上下當順以聽坎耳坤順也故
六三在下卦之上又動而主之則尸其事者衆也故
曰師或輿尸坤為輿輿又訓衆三動得位尸之也坎

變兌毀其師也故大者无功而凶荀卿論兵曰權出一者彊權出二者弱易傳曰軍旅之任不專一覆敗必矣

六四師左次无咎象曰左次无咎未失常也

六四之動震為左日在地下暮夜之時師宿為次坎阻水也險難在下救者當倍道赴之動而左次阻水以自固豈用師之常哉宜有咎然六四柔能自正而下无應知其不可行量敵慮勝臨事而懼未失坤之

常也於義為无咎春秋書齊師宋師次于聶北救邢
按兵待事卒能救邢何咎於次哉易傳曰度不能進
而完師以退愈於覆敗遠矣可進而退乃為咎也易
發此義以示後世其仁深矣

六五田有禽利執言无咎長子帥師弟子與尸貞凶象
曰長子帥師以中行也弟子與尸使不當也

五應二二為田震為稼坎為豕田豕害稼四時之田
皆為去害二往之五成艮手為執伏兌為言執言者

奉辭罰罪也六五柔中以任將帥二執言而行去民之害不得已而用師譬如田獵田既有禽然後取之田有禽則非无名興師執言則我有辭於義无咎矣故曰田有禽利執言无咎然六五柔於用人不可不戒九二震為長子帥眾而眾從之者以剛居柔威克厥愛以中道行師也若五動成艮於震為弟於乾為子之三則坎毀既使二主師又使三主之輿尸也所任不一雖正亦凶九五正也艮手有上使之意上使

不當也與尸之凶聖人再言之者任將不可不重也
易傳曰自古任將不專而致覆敗者如晉荀林父邲
之戰唐郭子儀相州之敗是也

上六大君有命開國承家小人勿用象曰大君有命以
正功也小人勿用必亂邦也

上六動乾在五上五君位大君也大君者號令之所
自出也故履之上九臨之六五皆曰大君上之三成
巽巽為命大君有命也有命以正有功也有大功者

開國使建國有小功者承家使受邑也四諸侯位震
為長子主宗廟社稷開國者也二大夫為家初陰在
下承之承家者也巽三在二四之中有開國承家之
象上師之成宗廟之位古者賞人必於祖廟示不敢
專故於上六併言之六三不正為小人三之上小人
用於上成坤必亂邦也行師之時貪愚皆在所使未
必皆君子及其成功而行賞則君子當使之開國承
家小人厚之以金帛優之以祿位不害其為賞功也

蓋胙之土萬世之利尊有德所以示訓若小人无厭
有民人社稷其禍必至於亂邦周頌賚大封于廟言
錫予善人也光武中興臧宮馬武之徒奉朝請而已
得此道也然寇鄧諸賢无尺寸之土亦過矣易傳曰
小人易致驕盈況挾功乎漢之英彭所以亡也或問
坤為土為國邑古亦有言之者乎曰周太史為陳侯
之子筮之遇觀之否觀六四諸侯之位也坤為土變
而為乾乾父坤母繼父母之國者也故曰其代陳有

國乎內卦坤為土風行地上不處者也故曰風行而著於土其在異國乎此皆以坤土為國也畢萬將仕於晉遇屯之比初九變也辛廖占之曰震為土車從馬公侯之卦又曰公侯之子孫必復其始二大夫位也言自大夫復為諸侯以坤土動於下也



坤下
坎上

比吉原筮元永貞无咎不寧方來後夫凶彖

曰比吉也比輔也下順從也原筮元永貞无咎以剛中也

比吉者比而吉也凡物孤則危羣則彊父子夫婦朋友未有孤危而不凶者人君為甚故比而吉謂九五也比輔也一陽在上四陰在下順從之比所以吉也故曰比吉也比輔也此合兩體言比也然比當慎不可以不與善不可以不長久不可以不正有是三者乃可以无咎以其當慎也故原筮以決其所從原再也如原蠱原廟之原比自復來一變師二變謙三變豫自謙至豫有艮手持震草占筮之象故曰原筮原

筮則其慎至矣復初九始於正四變成比不離於貞
元永貞也元君德也善之長也乾剛之始也蓋比道
之難既原筮以審之其始也相比以善其終也永貞
則无咎矣不然慮之不審其始比之不善或貞而不
永豈能无咎原筮元永貞者九五也九五之剛乾元
也故曰元位乎中正故永貞故曰以剛中也坎往則
坤來坎勞卦不寧也坤為方不寧方來也比之時下
雖比輔不敢自寧則上下相應多方來矣故曰不寧

方來上下應也謙坤三四五爻先來比之上六獨安其位而不來欲來則已後不來則履險而逼道窮而不知變故凶上六之所以凶者後夫三爻也故曰後夫凶比道貴先故也卦氣為小滿太玄準以密親象曰地上有水比先王以建萬國親諸侯

地上有水相比而无間乾五王也四諸侯位坤土在上國也坤為衆萬國諸侯衆多也比師之反九二為五有先王建萬國親諸侯之象建萬國者衆建也建

萬國則民比其國君親諸侯則國君比于天子封建
自上古聖人至于三代不廢享國久長秦罷侯置守
二世而亡此封建不可廢之驗也患封建不得其道
耳得其道者建萬國是已夏承唐虞執玉帛者萬國
成湯之時七千七百七十三國成周千八百國而夫
子必曰建萬國者衆建諸侯而少其力也衆建則多
助少其力則易制觀此則周官諸侯之制疑若非周
公之意也

初六有孚比之无咎有孚盈缶終來有它吉象曰比之初六有它吉也

初六不正未能信者也比道以信為本中心不信人誰親之以是比人宜有咎四與初本相應初動而正往比之則有孚信矣孚者信之應也春秋傳曰小信未孚故有孚比之无咎初六坤土坤為腹動之四成兌兌為口巽為繩土器有腹有口而繩引之坎水盈其中盈缶也缶所以汲質素之器誠之象水盈其中

亦誠信充實而無間之象有孚之謂也比之有孚何咎之有故曰有孚盈缶初始也四終也初自四復位終來也四非正應謂之它子夏曰非應稱它初比之以誠信其終也來有它之吉矣若始比不以誠其能終有它乎故曰比之初六有它吉也陸績曰變而得正故吉是也

六二比之自內貞吉象曰比之自內不自失也

六二九五中正相比剛柔正而位當聖人猶曰比之

自內者六二柔也恐其自失也二處乎內待上之求
然後應之比之自內者也故貞吉正則吉也不能自
重汲汲以求比動而自失其正道亦不可以行矣枉
尺直尋未有能直人者也故曰比之自內不自失也
易傳曰士之修己乃求上之道降志辱身非自重之
道也故伊尹武侯救天下之心非不切必待禮至而
後出也

六三比之匪人象曰比之匪人不亦傷乎

比之匪人與否之匪人同義子夏曰處非其位非人道也三四處中人位也人道相比以正六三柔而不正處非其位遠比于上六以非道而不應近比乎六四六二以不正而不受天地之間未有不相親比而能自存者也比之而人莫與不亦可傷乎虞翻曰體剝傷象彌子瑕曰孔子主我衛卿可得也孔子曰有命魯桓公求會於衛至桃丘衛侯弗與之見求比而不得不亦可傷乎可傷則悔咎不必言也

六四外比之貞吉象曰外比於賢以從上也

四以五為外內外相形而後有也六四當位不內比於初絕其繫應外比於五守正不動則相比以誠矣故貞吉五以德言之剛健中正賢也以位言之君上也以正比賢以臣比君外比之所以吉歟易曰東北喪朋安貞吉六四之謂乎

九五顯比王用三驅失前禽邑人不誠吉象曰顯比之吉位正中也舍逆取順失前禽也邑人不誠上使中也

九五比之主坎為明顯明比道者也故曰顯比五位
乎正中比者因以比之不規規以求比於物比之以
正中之道所以吉也故曰顯比之吉位正中也乾五
為王自四至二歷三爻坤為輿為衆坎為輪田獵之
象王用三驅也艮為黔喙坎為豕震為決躁內卦為
後外卦為前嚮上為逆順下為順故曰失前禽也顯
比之道譬之從禽王者之於田也三面驅之闕其一
面逆而嚮我則舍之背而順我之射則取之舍之者

明比也取之者明不比也所謂正中也施於征伐叛者伐之服者舍之故曰舍逆取順失前禽也坤在下為邑謂二也邑人者二乾也二之五艮見兌伏兌為口邑人不誠也王者之比天下无遠邇无内外无親疎不以邑人近則告誡而親之不以僻陋之國遠則不誠而疎之使人人以中道相比無適無莫則吉若顯比矣其道猶狹未吉也故曰邑人不誠上使中也或曰安知捨逆之為嚮我取順之為射取之曰觀其

所殺而知也射者從禽左而射之由左達右詩曰公
曰左之舍拔則獲故田有三殺自左膘達于右膈為
上殺射右耳本為中殺射左髀達于右髀為下殺面
傷不獻剪毛不獻鄭康成曰禽在前來不逆而射之
也去又不射也唯其走者順而射之王弼亦曰趣已
則舍之背已而走則射之

上六比之无首凶象曰比之无首无所終也

六三動而比上上比乎三成乾乾為首三者上之始

上者比三之終三不知比上則比之无首上不知比
三則比之无終比之无首无所終矣正者宜吉然上
六不免於凶者正而不知用也道與人同者也不相
親比與比之而无首雖正亦凶



乾下
巽上

小畜亨密雲不雨自我西郊彖曰小畜柔得
位而上下應之曰小畜健而巽剛中而志行乃亨密雲
不雨尚往也自我西郊施未行也

柔自姤進而上行至四得位上下五剛說而應之說

則見畜矣一柔畜五剛小畜大臣畜君也爻非所應
亦曰應之陰者陽之所求也故曰柔得位而上下應
之曰小畜此以六四言小畜之義也下乾健也上巽
巽也九二九五剛中也健而濟之以巽則易入剛不
過乎中則志行於上下兩者得則柔道亨而陽為陰
所畜矣故曰健而巽剛中而志行乃亨此以兩體二
五言小畜之才也兌盛陰也密雲者兌澤之氣上行
也雨者陽為陰所得相持而下者也六四志在畜君

以往為尚畜君者好君也不得於君其能畜乎故曰
密雲不雨尚往也此再以六四言小畜也乾天也在
內外之交而見天際郊之象兌西也我者內為主柔
自下升天地之理陽唱則陰和西郊陰也密雲不雨
陰先唱也以臣畜君雖尚往也然不待唱而先之則
其施未行施者膏澤下流也柔得位待唱而往則君
施行矣故曰自我西郊施未行也聖人言此示臣強
之戒且曰陰畜陽小畜大終不可以成大事乾天下

之至健至難畜者非剛健篤實輝光日新其德豈能
畜之在卦氣為四月故太玄準之以斂

象曰風行天上小畜君子以懿文德

天剛德文柔德風行天上剛為柔所畜小者畜也君
子以是懿文德傳言太虛無礙大氣舉之

初九復自道何其咎吉象曰復自道其義吉也

聖人欲明陽不受畜於陰之義故以履小畜二卦反
復明之小畜履之反初本在上二本在五三本在四

故初二皆以復言之三受畜而不得復者也初者九之位正也正者君子之道初九不受畜而復四猶未為得所宜有咎然由正道而復四亦以柔道下之何其咎哉於義吉也

九二牽復吉象曰牽復在中亦不自失也

小畜以一陰畜五陽五本二之位五動則二應同志者也二乾體剛健五巽體柔巽二進而欲復其所五以同志牽挽而復之巽為繩為股艮為手牽復也二

牽挽而後復者畜之已深不若初九自道而復為易
然在小畜之時五能下之引類自助為得中道二復
而在中亦不自失其正而吉兩得之也易傳曰同患
相憂二五志同故相牽連而復二陽並進則陰不能
勝得遂其復矣

九三輿說輻夫妻反目象曰夫妻反目不能正室也

子夏傳虞翻本輻作輶當作輶上九九三本相應若
動而成震坤其輿也陽畫輿下橫木也為輶九三見

畜不可動兌為毀折輿說輶矣其能進乎震為夫離
為妻為目巽為多白眼九三剛而不中見畜而怒故
反目相視妻制其夫男女失位不能正室也三四巽
離有家人象故以室言之妻齊也敵夫之辭震離同
象故曰夫妻初二畜於巽而復獨九三畜於六四而
不復者九三失道比於四而悅之也陽无失道陰豈
能畜之聖人詳言此者為陽畜於陰之戒易傳曰未
有夫不失道而妻能制之也春秋傳晉獻公筮嫁伯

姬於秦遇歸妹之睽史蘇占之曰車脫其輹歸妹外卦震也上六變離震毀車脫其輹與此爻及大畜九二同象

六四有孚血去惕出无咎象曰有孚惕出上合志也

五君位體巽四近而相得以正相比臣畜君者也四不繫於初誠信孚于上有孚也三陽務進而上四以一陰乘之若畜之以力陰陽相傷可不惕懼乎唯誠信孚于上而與上之志合則物莫之傷而惕懼遠矣

伏坎為血為加憂巽為多白眼惕也血去惕出者四
五相易合志之象象辭不言血去蓋惕出則血去可
知九五之剛六四在下止畜其欲非誠信感之上下
志合是嬰龍鱗也豈能畜哉惟其有孚志合守正而
見信故以此處上下之際而无咎自古人臣得位上
畜乎君下畜乎衆君子不如六四之有孚未有不傷
霍光之於魏相蕭望之卒見傷也

九五有孚學如富以其鄰象曰有孚學如不獨富也

五近四相得无應以分其志有孚也易言交如者異
體交也言孳如者同體合也四五同巽體君臣合志
孳如也小畜一陰畜五陽常恐力不足而見傷五於
畜時雖得尊位而不能畜以其富也委之於鄰併力
而畜之有孚孳如則衆陽皆為我用矣陽實為富陰
虛為貧四虛五實而五與之共位食祿四得盡其心
能以富用其鄰也以如師能左右之曰以相比為鄰
巽離亦鄰也富以其鄰不獨富謂富善人也

上九既雨既處尚德載婦貞厲月幾望君子征凶象曰
既雨既處德積載也君子征凶有所疑也

大畜畜之以止畜極則散小畜畜之以巽極則畜道
成矣上成動而畜三九三止而見畜坎見兌澤流既
雨也既雨則陽與陰和矣九三不往而還其所既處
也既處則不進矣陽剛健既雨既處豈一日畜之哉
柔巽易入陽說而受制則剛者退避柔者尚之積之
甚微至於載之而有不知也坎為輪乾陽德也而在

下巽陰德也而在上陽反載之矣巽為婦當以柔巽
從夫為德陰而畜陽柔而畜剛非德之正以是為正
守而不變危厲之道譬之月也望則陰道盛滿即復
虧而成巽巽畜乾豈婦德哉坎為月離日在允西月
望之時也六四未中幾望也君子上九也陰盛陽消
君子有害動而去之則正征以正行也然不可動動
則凶故不得已而處有所疑也巽為不果疑也可動
者其唯小畜之初乎



兌下
乾上

履虎尾不咥人亨彖曰履柔履剛也說而應

乎乾是以履虎尾不咥人亨剛中正履帝位而不疚光
明也

履踐也言踐履之道一柔而履二剛上為乾剛所履
不言剛履柔者三柔履之主也以柔履剛踐履之難
處之得其道履之至善也故曰柔履剛此以六三一
爻言履之義也卦後為尾兌為虎為口虎口咥人者
也乾健也上九極乾六三以柔履其後上九與三相

易上復成兌是履猛虎之尾怒而見噬者也三兌體
下說乎人之情上應乎乾上極健而我應之以和雖
剛而不忤和而不流柔而不犯推是道以行蹈呂梁
之險可也故處乎五剛之間柔而能亨關子明曰履
而不處其周公乎故曰說而應乎剛是以履虎尾不
噬人亨此合兩體言履至尾而亨也九五以天德臨
下剛不中正有所偏繫則君子畏禍將去之小人以
柔邪而進陽為陰所病矣九五中正踐帝位立乎萬

物之上无所累其心舜禹之有天下也履道至此先明格于上下矣離為明疾病也陰陽失位為病六三不正五不應之不疚也故夫子贊之曰剛中正履帝位而不疚光明也今之王古之帝也獨於履言帝位者易君德而當君位者五卦否无妄同人遯乾體也而无履之時有是德有是時而履是位者唯履而已上下履位物物循理之時也在卦氣為六月太玄準之以禮

象曰上天下澤履君子以辯上下定民志

天澤相際目力之所極則視之一也而上下實異體不可不辯禮者人所履表微者也坤為民巽為不果疑也故君子以禮辯上下定民志古之治天下者思去民之疑志以定之爾

初九素履往无咎象曰素履之往獨行願也

初在履之下而正安於下不援乎上者也四動而求之斯可往矣往以正不失其素履往成巽巽為白亦

素也故往无咎履九五中正君位也四爻不正初九獨正往之四者將以正夫衆不正獨行願也非厭貧賤也非利富貴也是以往无咎易傳曰夫人不能自安於貧賤之素則其進也乃貪躁而動求去乎貧賤爾非欲有為也既得其進驕佚必矣故往則有咎九二履道坦坦幽人貞吉象曰幽人貞吉中不自亂也二動成震震為大途坤為平行履道坦坦也道中正也初動二成坎坎為隱伏初未往二伏于坎中幽人

也幽人言靜而无求及初復位動而不失其正幽人之貞也正則吉初之應四動而往靜而來上下无常也而幽人守正所履坦坦者自若其中不自亂也坤為亂二正得中不自亂也久幽而不改其操者其唯九二乎易傳曰九二陽志上進故有幽人之戒

六三眇能視跛能履履虎尾咥人凶武人為于大君象曰眇能視不足以有明也跛能履不足以與行也咥人之凶位不當也武人為于大君志剛也

六三離為目兌毀之眇也眇者不能視遠言其智不足以有明也巽為股兌折之跛也跛者不能行遠言其才雖有上九之應不足以相與而行也卦一陰介五陽剛健之中才知不足處非其位柔不勝剛必有凶禍故曰啞人之凶位不當也卦後為尾兌為虎為口履乾之後三往乎上成兌虎口嚙之啞人之象六三位不當故也在卦言不啞人亨交言啞人凶者卦體說而應乎乾應則以柔應剛以說應健如列禦寇

所謂達其怒心也又則才知不足而有為于大君妄動也是不知宋王之猛者也乾五為君上九大君也兌西方肅殺之氣武也天右行故天事武三居中志也六柔居三志剛也六三往之上九武人有為于大君志剛則決不慮其才知不足而決於有為致咥之道益成括是已觀六三妄動而凶則知初九之往為吉矣

九四履虎尾愬愬終吉象曰愬愬終吉志行也

九四履三陽之後下有兌虎履虎尾也五剛四近君多懼然以陽居陰謙而不處動成震震為恐懼惴惴也恐懼則敬慎敬慎則動无非正始也履虎尾終也恐懼不失其正而志上行于君終吉也中為志動則行

九五夬履貞厲象曰夬履貞厲位正當也

六三履虎尾咥人凶者位不當也九五其位正其德當而貞厲者剛天德不可為首也九五履乎正位當

用六三之柔濟乎剛健而說決而和斯可以履天下之籍矣人君擅生殺之柄不患乎无威患乎剛過不能以柔濟則臣下恐懼而不進人君守此不變危厲之道允為決三五相易成夬故曰夬履或曰六三不正何以用之義取柔濟剛也易傳曰古之聖人居天下之尊明足以照剛足以決勢足以專然未嘗不盡天下之議

上九視履考祥其旋元吉象曰元吉在上大有慶也

祥者吉之先見生於所履者也視我之所履則吉之
來可考而知之矣天下之理未有出而不反者也上
九所履不邪其旋反者必元吉也陽為大為慶上動
以正乃致大有吉慶之道故曰元吉在上三在內為
離目視履也上動而三有慶其旋元吉也上履之終
故其祥可考焉

漢上易傳卷一

謹案第一頁後三行而乾在七刊本七訛已據連

山易卦序改

第六頁前八行震巽艮兌互相伏者也刊本互訛
兌今改

第四十二頁前六行困而不學刊本不訛知今改
第七十九頁後七行六三位不當故也刊本故訛
一今改





總校官庶吉士臣侍朝
校對官修撰臣張書勲
膳錄監生臣陸學稼